

焦太史編輯國朝獻徵錄

焦太史編輯國朝獻徵錄卷之一百五目錄

藩府僚

長史

桂彥良

劉璟

李質

陳南賓

程通

鄒朴

葛誠

龍燁

石撰

蕭用道

劉淳

董琰

金實

趙季通

朱子瓊

周孟簡

楊黼

賴添貴

李伯燠

楊述

李頌

張景明

薛端

李勳

梁溥

林光

黃琮

吳稷

周積

趙德宏

王允武

紀善

周是修

周衝

潘松

會稽張汝霖

全枝

吳興茅元儀

錢塘徐象標
刻行

晉王府左長史桂彥良傳

晉王府左長史桂彥良名德稱以字行寧波之慈谿人元鄉貢進士爲衢之包山書院山長轉平江路儒學教授罷歸時張士誠據浙西方國珍分省浙東數致禮聘俱不就洪武六年朝廷大徵天下儒士浙江叅政徐本首以彥良應待詔闕下奏對稱旨擢太子正字 上嘗出御製詩文示彥良彥良卽 上前大聲誦琅然左右驚愕翰林學士承旨私戒之 上知之謂曰儒者事君正當誠意自然無事矯揉也時給事中蔣學等十七人講學文華堂寵愛特甚學等多

侍寵不自修飾 上欲擇端重儒者以率勵之乃命
彥良及修撰孔克表爲之師各賜白金三十兩俾學
筆執弟子禮 上嘗訪以治道彥良對曰治道在心
心不正則好惡頗好惡頗則賞罰失當賞罰失當則
無以致治功故爲治在乎正心正心之要在乎德念
窒慾而已 上善其言又嘗從登內城 上從容顧
謂彥良曰朕比來好善惡惡如何彥良對曰惟人君
至公無私則好惡自得其當孔子曰惟仁者能好人
能惡人 上曰善卽書其語揭于便殿樞閣七年日
長至有事于園丘詔詞臣撰祝文以進內有予我二

涉

製正
心圖

龍王
相改
長史
可

字或謂其不敬彥良對曰成湯祭上帝曰予小子履
武王祀文王之詩曰我將我享古有此言待儒者泥
而不通耳 上曰爾言是也嘗命詣臺省審錄疑獄
得以情原者數十人十一年授晉王府右傳 上親
製誥文以賜之彥良以爲輔導之職莫先于格心乃
製正心圖以獻晉王十三年罷王府傅相改長史司
左長史十五年朝京師進太平十二策言多剴切
上嘉納之十八年以疾賜歸鄉里洪武二十年十一
月卒 吾學編

谷王府左長史青田劉公璟傳 陳 中

劉璟字仲璟生時月食復光誠意伯嘆曰夫隧迺緒而卒或翰之者也弱冠咀嚙經傳善談兵究極韜畧握奇諸說二十八師事石樓子明志武慮鋒稜古人適甌寇葉丁香叛朝廷勅延安侯唐勝宗提兵討之決策於璟破之復命白璟才略 高皇帝喜曰璟真伯溫子也朕將大授額年少姑緩之不虞速樹如是顧謂侍臣曰璟絕有父風允協朕望如此賜上尊楮璟貌偉豐髯論說英傑 帝愛之次日召璟謂曰朕欲卿日夕左右夜考宋紀惟閣門使如儀禮立百官

綱目
事并
其天
本續
左本
實有
之望
刑以
深余

之上爲朕宣喚傳遙處爾無踰此官遂拜職賜第馬
衣帶金書除奸敵佞四字於鉄簡賜之且命曰百官
敢有不法卿持此簡糾正時表都御史奏車牛事件
首璟當殿以簡擊其項自是舉朝畏璟時谷王年十
三將封宣府 上素愛王母朝謂侍臣曰谷王年少
羽翼無人奈何諸大臣畏璟風力樂璟外補奏曰輔
幼藩非忠勇敢直不能閤門使劉璟其人也 上額
之卽日授谷王長史并勅提調肅遼處寧燕趙六王
府事巡行一日至燕 文皇帝與璟奕璟勝帝曰先
生獨不少讓朕耶璟正色曰臣可讓則讓不可讓則

獻十
大策

世間
見錄

不敢讓 帝默然戊寅夏六月 高皇帝晏駕 皇
太孫嗣位巳卯收元建文秋八月璟聞 太宗南渡
遂馳闕獻十六策 嗣帝不用命璟赴大將李景隆
軍景隆不用璟計喪師會天大雪璟夜半渡盧溝河
水陷馬斃璟跋水躋岸捨雪走良鄉裂趾次日跛行
三十里時璟之子豹自大同來赴難越良鄉至涿州
失璟所在道遇素所差指揮使陳玉指璟行次豹騎
馱反涿數十里遇璟翼璟上馬遜去還家養疾辛巳
璟輿疾赴闕進聞見錄千萬言 嗣帝不用命璟歸
待用至家杜門讀書默觀天下動靜壬午六月 太

宗入承大統璟辭疾不起 上欲用璟罪璟逃叛親

王繫至京強以官璟辭下璟獄一夕辯髮自經時鄭

朱子罪沒其家權宦希旨引其例帝曰璟家難例鄭

朱子詔其家歸塋之嘉靖乙酉提學萬潮東視學書

生陳中川白其事立像配享文成之廟野史氏曰宋

季犬羊入帝中華天日蒙恥蓋自有天地以來非常

之變也 高皇起而驅之九十三年流腥積毒一旦

蕩然建文萎弱中葉不震 文皇帝入承大統故物

重光天下拭目游泳太平先生以故家宿碩才畧早

試於 高皇帝之朝忠義再者於 文皇帝之日是

故才畧所以恢宏開基之統緒忠義所以感激千萬
代之人心夫非多於 太祖而少於一太宗也嗚呼
賢哉

谷府長史劉璟

忠節錄

劉璟字仲璟文成公基子也沉涵經傳喜談兵究極
朝畧握奇諸書偉貌豐髯議論英發旣賊葉丁香叛
延安侯唐勝宗討之決策於璟破賊還薦璟才畧

高皇喜曰璟真伯溫兒矣名見謂曰朕欲汝日夕左
右考宋紀惟闕門使立百官上以宣達爲職處爾無
逾此官者遂授之以剛直聞會谷王就封 上謂侍

臣曰谷王年少誰可羽翼王者請大臣故忌璟對曰
關門使劉璟忠勇果敢可任乃授谷府長史谷邸在
宜府璟設險足兵諸胡屏息嘗至燕 文皇與璟奕
璟勝 文皇曰卿獨不少讓朕耶璟正色曰可讓則
讓不可讓璟不敢讓也靖難兵起璟馳還京獻十六
策不聽令叅李景隆軍事景隆又不聽景隆戰敗璟
夜半渡盧溝河兵陷馬斃璟力跳躋岸冒雪走良鄉
此爲之翼跛行三十里璟子穎自大同赴難越良鄉
至涿州遇璟翼璟上馬奔還家養疾後與疾赴關進
聞見錄千萬言又不聽令璟還家以俟 文皇卽位

名璟稱疾不至乃以逃叛親王罪逮至京入見侃侃
不屈但稱殿下且云殿下百世後逃不得一箇字
詔下獄自經死法官希青綠坐其家 上以文成故
不許乃得歸塋嘉靖間提學副使萬潮有像配享文
成祠

靖江相府右相李公質墓志銘

陳 璉

公諱質字文彬號樵雲姓李氏其先開封祥符人在
宋季有仕于德慶者因家焉公生穎悟有大志蚤知
嗜學經史子集無不讀讀輒記憶既長遭元季多故
與時落落不合遂家居不出日與弟文昭放情山水
以詩酒自娛居無何中原擾攘嶺海多事公起構義
兵捍鄉里及德慶路陷士民遑遑無所載推公入守
之日夜浚城隍繕甲兵扼險要以遏他寇由是一路
賴之以寧時據鄉邑者多剝剝殘忍公嘗戒麾下非

遇敵母身殺或執敵人來獻率給衣糧糶之家雖富
饑急于賑施三族與鄉里流寓之貧者咸有所仰以
故一時名士如建安張智茶陵劉三吾江右伯顏子
中羊城孫仲衍王彥舉皆聞風來歸及大明皇帝
定鼎金陵遣師南討洪武戊申四月平章廖公永忠
恭政朱公亮祖總師至公遂散麾下全城歸附總兵
遣使人奏上嘉公忠誠召至慰勞再三賚予優渥
就擢中書斷事能執法丞相都督咸敬憚之五年壬
子授刑部侍郎階中順大夫尋陞本部尚書階嘉議
大夫尤慎刑獄盡哀憐之情致淑問之頌寬猛適中

爲 上所知日益親幸時開行省于浙江 上念厥
地素重號稱難治宜簡廷臣有德望才器者往綏之
卽拜公浙江行省叅知政事階中奉大夫是年秋九
月也下車首以承流宣化爲已任振紀綱正風俗勸
農桑興學校舉遺賢卹民隱知無不爲爲無不力居
三年惠流兩浙厥績以懋聲聞于上 天子念公老
名還致政于京師嘗入見賜坐便殿訪以時政得失
直言無隱 上益重之入年乙卯十月復起爲靖江
王府右相階資政大夫有勅獎諭甚至公益思竭誠
以盡輔導之職嘗入覲因奏乞歸省先隴 上可其

請王親揮翰賦詩以賜復命藩憲元僚與府中官屬
宴餞江許人莫不以爲榮後王坐事去國公隨終焉
公美風儀性孝友治家有法接人以誠雖極顯融情
素冲淡暮年尤工于詩有樵雲集若干卷生于元延
祐丙辰三月十一日卒于洪武庚申閏五月某日初
權厝金陵聚寶山後某年某月某日歸葬鄉之清秀
里希山之原

蜀府長史陳南賓傳

黃佐

陳南賓名光裕以字行長沙茶陵人少讀書負俊名而持行慤雅元末授全州學正因家焉洪武二年應賢士聘至京師一時名儒學士如張以寧輩皆折節與交除無棣縣丞轉膠州同知所至以教化爲先南賓老成有文學以經術帥吏事時稱醇儒十八年拜國子助教入見高皇帝命之講洪範九疇反覆辨析意甚詳明上大喜曰此天下善講書者也御書其姓名于殿柱以褒之其教國子尤善訓迪窮日授

書名殿柱

受無情容二十二年擢蜀府長史時蜀獻王好學禮
士於玉牒中最號賢王然南賓猶隨事規諫王甚敬
禮之造安車以賜復爲構第名安老堂學士劉三吾
記之二十九年四川鄉試應聘與漢中府學教授方
希直同爲主考官所取皆名士論者稱焉及卒年八
十南賓作詩清勁有法在蜀題詠最多蜀人傳誦之

長史程公通傳

程敏政

公諱通字彥亨其先自歙篁墩遷績溪祖平素業儒
洪武初以鹽法坐繫御史廉其非辜喻其旁引衆人
則可免平起對曰某不幸爲人所誣而又誣人欺天
甚矣寧以身待罪御史嗟異竟謫戍延安有伺謫而
旅死者平遣子負遺骨歸其家其家以貧故不納又
買地塋之伯父以忠洪武庚申用人材舉知潮之程
鄉縣有治跡父以誠尤以孝友聞初以忠子泰將省
父程鄉以誠與俱中道聞以忠得罪被逮且瘁作偕

行者誅秦反走以誠大罵曰汝父坐事正當捐生赴
教舍之而歸獨何心乎遂徒步直前既至而冒瘴死
聞者悲之公少有至性又得家庭之教動必尊禮嗜
學不倦鄉先生奇之年十四補縣學生二十二以貢
入太學時洪武乙丑也丙寅聞以誠喪免歸徒步過
嶺迎柩還葬墓已廬墓三年哀慟毀形妻子至不相
識戊辰復上太學時平已老公上書言臣壯而無父
祖猶父也臣祖老而無子孫猶子也更相爲命今邊
徼戍卒如林顧豈少臣祖者辭極懇切書奏 高皇
帝憐之而持其章不下私命兵部驛召其祖既至乃

弁召公東西立玉階下顧公曰汝識此人否祖孫相
持哽噎不能仰視 高皇帝歎曰孝哉若人命兵部
除其籍驛送平還鄉庚午秋公以尚書舉應天府鄉
試時遣諸王將兵行邊以封建策諸貢士於廷公所
對稱旨親擢第一授遼王府紀善辛未從王闕武臨
清壬申從之國遼西時王府未建以祖喪免歸復廬
三年服闋復任未幾 高皇帝上賓庚辰從王渡海
南還辛巳進左長史明年始從之國荊州公悉心輔
導王敬禮之凡一國之事咨焉府中有衛士紀綱者
用訓事得幸公座名而笞戒之會 文皇帝舉兵靖

難遣人至荊州公草上封事數千言 文皇帝既正
大統紀綱者以入賀留侍歷官錦衣指揮使被劾問
因乘間及封事遂有詔械公詣京師簿錄其家公既
死家人發戍邊又下績溪簿錄其家得捕田數十畝
遺書數十百卷牯皮數張黃希范洪武末先出知徽
州府雅與公善至是亦爲衛卒所捕并籍其家同赴
京師而績溪程姓最衆幸使者仁恕罪止一房餘獲
免焉初遼王雅重王命圖其像又錄其世譜親爲贊
之後十年公異母弟彥廸以事至荊州王召見之語
及舊事曰汝欲見汝兄否彥廸頓首不知所對王出

遺像示之彥迪哭失聲并請其世譜以歸永樂中有
仇家欲訟之者適彥迪他出家人懼而焚其像獨遺
其世譜云公初讀書卽厲志聖學居常恂恂如有弗
逮至臨事則毅然莫能奪故所立如此爲詩文不求
異而主于理然辭氣超越專工者反不能及有稿百
餘卷悉毀于官

遼府長史程通

忠節錄

程通字彥亨徽州績溪人祖平業儒漢武初謫戍延
安有同謫而旅死者平遣子以誠負遺骸歸其家共
家以貧故不納乃買地葬之通少有至性嗜學執禮

漢武乙丑通以縣學生應貢入太學父以誠歿嶺南
通徒步扶柩歸塋廬墓哀毀至妻子不能識戊辰復
上太學時平戊延安年已大耋通上書言臣壯而無
父祖猶父也臣祖老而無子孫猶子也祖孫更相爲
命願代其役辭極哀懇 高皇憐之而持其章不下
陰召平至并召通東西立 高皇指平顧通曰汝識
此人否于是祖孫相持而泣哽咽不能仰視 高皇
嗟嘆良久命兵部除其籍驛送平還鄉庚午通舉應
天府鄉試時遣諸王將兵行邊以封建策諸貢士于
廷獨通對稱旨置第一除遼府紀善辛未從上閱武

臨清壬申從王之國遼西建文初北兵起從王渡海
來朝進左長史從王之國荊州悉心輔導王敬禮之
凡國事必咨焉府中衛士紀綱者以狡倖幸於王通
屢笞戒之建文君遣人至荊州道上封事乞防禦北
兵數千言 文皇卽位綱入賀留侍爲錦衣衛指揮
使數被顧問乘間言通曩有封事指斥乃詔械通至
庾死獄中家屬發戍極邊簿錄其家得田數十畝遺
書數百卷牯皮數張績溪之程晟衆幸使者仁恕不
劬及

秦府長史鄒朴

忠節錄

鄒朴字爾思江西吉安永豐人建文初以儒官仕周府直言極諫沮其邪謀王不聽嚴刑禁錮甚密王逆謀覺大臣以朴諫疏聞建文君嘉其忠義召至京具言始末特陞監察御史尋陞秦府長史歸省聞鄒瑾死憤激不食而卒時人謂瑾朴永豐連璧云

燕府長史葛誠

忠節錄

葛誠未詳何許人以進士爲燕府長史靖難師未起時文皇使誠入奏事覘朝廷所爲建文君密問燕府事誠鼻以實告建文君乃遣誠還燕使爲內應靖難師將起誠切諫不聽及詔讓燕文皇稱病盛夏擁火猶自謂寒甚張昺等入問疾誠密言王無恙以不得上心故宜爲備誠又密疏以聞會燕人奏事京師執下獄得燕謀蹤跡卽發符建燕府官校又令昺等發兵內應盡簿錄府中人文皇大恨殺誠夷其族

晉府長史龍鐔

忠節錄

龍鐔字德剛江西萬載人洪武十三年貢爲國子生授浙江按察司副使以微累降長洲知縣尋陞晉府長史建文中靖難師起徵兵於晉鐔以大義不可靖難後詔械鐔至不屈死之有收其遺骨得所自書贊云

寧府長史石撰

忠節錄

石撰山西平定州人洪武中爲寧府長史靖難師至所過郡縣皆下撰在大寧獨欲爲守備計及北師攻拔大寧執撰終不屈遂支解而死

長史蕭用道墓表

楊士奇

靖江府右長史蕭用道坦行甫既得痺疾奏乞歸鄉里便醫藥忤旨降宣府鵝兒嶺巡檢至宣府疾日益明年七月十四日卒於官永樂壬辰歲也先在靖江時自度疾不可起預爲墓志迫易質之前二日取酒觴同官訣別又預作祭文自道其平生而寓夫全歸無遺憾之意其可爲遠也矣既歸塋于鄉後廿有三年其子肫來求表墓蕭楊世婚姻家士奇與坦行甫兄弟在鄉里相交好在京師同館舍今之知坦行甫

者獨士奇深比五六年士奇兩扈從廼邊至宣府經
錫兒嶺下馬入巡檢司領脈其山川景物黯然蕭條
莽蒼而追思坦行甫平昔志意未嘗不低回感惻而
繼之以涕淚也則表墓士奇何辭蕭氏出南齊西昌
侯殊誅之裔世家西昌邑西柳溪之上其七世祖森
宋衡山縣丞高祖古山曾祖靜安祖方平皆通儒隱
居終身父尚仁學者稱正固先生尊爲經師嘗徵至
京 太祖高皇帝與語重之特授潭府長史固辭除
平涼府學訓導徙居邑北之栗園里元配楊氏士奇
從姑也繼羅氏生坦行甫初諱遵字用道後以字行

遂別字坦行云自少英特不凡負奇氣讀書日數千
言治尚書而諸經子史皆博通下筆爲文滔滔咸有
根據一時同輩莫或過之正固先生沒其學者皆就
坦行甫卒業後多舉進士去建文初詔郡縣舉懷才
抱德者吉安知府朱仲智舉坦行甫送詣京師試文
章翰林擢靖江府直史授承直郎時靖江悼僖王好
學得坦行雅敬重之所言多見聽用召入翰林修類
要太宗文皇帝師已渡淮在廷公卿倉惶失措坦
行甫與衡府紀善周是修上書論大計措斥用事者
誤國書下廷臣及兩人議用事者怒盛氣以詬兩人

兩人吃不爲動左副都御史練安言國事至此尚不
容言者乎顧所論吾過有卽改無則加勉詎者愧而
止 文皇帝旣嗣天位命翰林及王府儒臣考閱洪
武實錄坦行甫與焉事竟賜鈔時詔百司復舊制罷
直史司爲諮議所改坦行諮議無幾陞諮議所爲長
史司遂陞右長史授奉議大夫永樂元年從王之國
桂林初至凡國中祭祀所需下有司備後凡祭祀府
察屬皆勸王下有司備之坦行曰初至倉猝不能自
備可一行之不可以再且祀神在致吾誠使人代備
物非誠也况未請於朝而擅使民非制乃止後坦行

進表詣京師王府竟下有司備祭物事聞長史以下皆得罪王始悔不用坦行言坦行數言於王宜務善納言以厚德奉法愛人以保福又陳八事曰慎起居寡嗜慾勤學問養德性簡鞭朴之刑無侵下人之利常接府僚以通羣情簡擇謹厚之人以備差遣又作端禮體仁遵義廣智四門箴以進王問四門之名遺信何也對曰五常之信猶五行之土實有仁義禮智之德卽信在其中王又問古今人多好名何也其意以譏坦行之屢言對曰君子必不好名名與實譬諸影與形有形斯有影有實斯名隨之矣河間東平皆

有實德故其令名在世與日月同一悠久惟殿下勉
夫在己之實耳凡於進講之際必反覆敷暢其旨坦
行負直氣侃侃能面折人過失未嘗稍屈已求合一
語不合掉臂去不顧而嫉脂韋軟媚人恥與同列事
親孝以祿不逮養在公遇盛宴未嘗醉飽於族姻有
恩於朋友有信義性澹素一繡衣入朝則服公退布
袍疏食不改處士時爲政達於大體所著詩文數十
卷藏於家春秋五十有五子垣宣德二年進士吏部
文選主事

周府長史劉先生淳傳

李 濂

南陽之墟有菊潭焉其水極甘冽潭旁多菊莖短而
花繁色味異於常菊居民飲此水壽多至百餘歲劉
先生自南陽徙汴猶以菊莊爲號其摩志桑梓之思
乎先生名淳一作統志字文中高祖真知南陽府曾祖

武中書右丞謚武襄祖塤同知靖江路父光祖陽翟
令生三子孟深晦德弗仕仲溫樞密副承旨先生其
季子也自幼穎敏不羣甫能言聞長老談論能解語
意輕重長嗜學問博物洽聞凡天文地理陰陽醫卜

諸子百家無所不窺居家孝友工詩善屬文築室樓
中以文史自娛不求聞達元末兵亂中原鼎沸先生
避地洛陽洛陽士大夫愛其文行多樂與之遊壺觴
詠歌以待天下之清 皇祖開基先生始出遊四方
所過郡邑有司交薦辭不就洪武二十五年壬申以
原武令陳義薦爲其邑學訓導時兵燹之餘北方學
校久廢士弗知學先生循循啟迪靡間寒暑自是人
文蔚興登科第者數人是時先生年未艾乃遽謝事
去占籍祥符治田舍爲定居計杜門掃軌專力著述
茅屋土垣若將終身焉維時周藩方闢東書堂延訪

者宿爲世子師會有薦先生學行者乃禮聘就塾先生每進講必先忠孝禮義俾王遠聲色貨利以無干訓典世子庶子守先生之誨咸知飭檢無驕縱氣壬午右長史闕王疏薦于朝允之先生之爲右長史也數有論諫如毀塌房酒務罷舍貧私惠減省朴刑一切越禮度者咸更之持正匡輔不遺餘方雖游衍燕間弗忘規諷如中和亭熙春堂蘭雪軒虛白齋悉爲歲銘欲王知所警惕永樂甲申有竊廩產於封內神后山表獻京師先生作頌以張天休端禮門夾路楓盛夏如蓋偶枯數榦先生歷陳谷徵進戒于王王納

其言修省枯幹復榮王乃書一牌懸於樹曰憶忠槐
先生一日自惟曰昔人謂知足不辱知止不殆吾以
衰老之年曳裾不已母乃不可歟乃懇乞骸骨歸臥
夷門之下是時年八十餘矣華髮丹顏耳目聰明猶
親翰墨里中子弟挹衣從游者弗拒德望風節士林
慄慕學者咸稱之曰菊莊先生洪熙元年卒壽九十
有七所著有菊莊集白雲小稿修辭正音四書解疑
小學大學羣經要義刊正王叔和脉訣纂述傷寒秘
要皆梓行于世

趙府右長史董琰傳

實錄

董子莊名琰江西樂安人博學有操行洪武壬子舉鄉貢免會試除雲南學官後用薦擢廣東茂名知縣和易近民不爲赫赫立名譽而民戴其惠永樂中興修大典陞北京國子監司業嚴重善教導再陞趙王府右長史恭勤小心隨事匡正不爲苟容時王所行屢愆禮度上輒以責長史子莊百挫不變而執守愈堅至是當陪祀國社子莊夙興嚴冠衣齋室端坐而卒時永樂十八年三月

衛王府左長史金公寶墓

楊榮

衛府左長史三衛金君以正統己未夏五月二十日卒於官子統謁子文表諸墓爲之叙曰君諱實字用誠浙之三衛開化人曾祖振之祖伯圖父德厚三世皆不仕母蘇氏君自幼穎悟書過目成誦始從叔祖戶科給事中王鉉學卽知屏去浮靡專意經傳暨游邑庠甚爲典教者稱賞且以遠大期之歲壬午太宗皇帝入正大統請闕獻書以君德民政爲之綱躬行仁義虛己納諫明察善斷審於用人恭儉節用爲

君德之目厚風俗尚廉耻省刑罰薄賦稅愛民力爲
民政之目 太宗嘉納其言復親策之對稱旨命入
翰林與修 太祖皇帝實錄書成賜以金幣永樂紀
元擢翰林典籍修永樂大典未幾特選爲東宮講官
時 仁宗皇帝在儲位眷顧累加丁亥以外艱去服
除陞左春坊左司直卽日侍經筵講說詳明致有良
佐之褒辛卯丁母憂哀毀成疾甫十年始起任職
仁宗登極簡宮僚輔導諸王乃授衛府左長史階奉
議大夫誥贈其考如厥官妣爲宜人是歲復召入西
掖纂述先正格言以備顧問宣德丙午歸謁先塋恩

賜優厚拜奠既畢日召鄉党宗戚相與燕樂以榮

上賜既還益以輔導爲已任上深敬禮之今上

皇帝嗣大寶郊祀謁陵悉以命王左右之力居多戊
午冬王薨哀感成疾已未春爲禮部會試同考官事
峻上疏乞骸骨命下而卒享年六十有九君天性至
孝少遊學官以不得奉旦夕歡朔望歸謁必奉觴上
壽以悅親心父沒奉母宜人娛養備至友愛季弟老
而弗衰處鄉黨以誠信善則揚之過則從容規之于
弟好學者激厲而誘進之至於周貧恤難不吝所有
故人林文節卒於京親爲殯斂歸其遺骸太學生江

表死無所托君既爲治喪事閱其篋得白金數十兩
封議以歸其家居家敦行節儉而賓客過從卽命酒
爲歡論談竟日疊疊忘倦閱經史日有程限或有事
妨夜必補之不以寒暑少廢故經史子書以及陰陽
星曆醫卜老釋諸書悉能探其願而究其非嘗曰人
不能無非覺而正之斯善矣遽伯玉行年五十而知
四十九年之非孔子嘗以君子稱之因以覺非名齋
賦詩自警有靜存動察兢兢自持之語爲文章春容
暢達理與氣俱詩則和平冲淡無雕琢之病有集若
十卷藏於

趙府左長史趙季通傳

實錄

趙府左長史趙季通字師道天台人由教官舉任吉安永豐知縣調漳州龍溪寬厚愛民民甚戴之永樂初與修太祖皇帝實錄書上除國子博士陞司業調北京國子司業簡爲趙王府左長史宣德二年七月卒時國子司業董子莊簡授趙府右長史兩人皆端厚和平操守堅確雍容詳惟有政事才同心輔導隨事規益委曲盡誠於侍講讀必推理以檢諸事多所開悟王甚禮重兩人太祖皇帝仁宗皇帝皆深知之當時論親藩輔導之良蓋趙輩爲極選云

越府右長史宋君子環墓志銘

楊士奇

宋之先自廣平徙江西之新淦又自新淦徙吉水至榮甫又徙廬陵積財能施及其子彬之孫成章皆不仕成章生若璪翹楚倫輩中與大學士解公游公屢稱之其卒也爲之銘墓娶孫氏子環字文瑩自幼淳厚秀穎善學問從明經師勤不懈學中永樂三年第二甲進士爲翰林庶吉士與修永樂大典書成被賜齊擢吏部驗封主事授承直郎居職勤慎會從隆平侯董修太岳太和山宮觀能周悉人情而矜恤其力

竣事陞吏部考功郎中授奉議大夫屬建北京又從
侍郎司達采木湖廣以寬厚贊遠衆咸悅之 仁宗
臨御封建諸子簡用輔導樞梁府右長史授奉政大
夫賜諡命又以其散官職事贈其父而封其母太宜
人妻宜人爲長史踰年小心恭恪王敬禮之丁內艱
去贖贈甚厚居喪杜門不出服闋改越府右長史凡
持已處事如在梁府一府賢之宣德八年六月八日
以疾卒享年五十有二孝悌之行一出天性處朋友
鄉黨悃信義爲人和夷坦一犯未嘗校自守有素再
以使命過鄉里無少長疏戚接之懽然見郡縣長吏

敘寒溫而已未嘗斥語及私故尤爲鄉先輩所重居
兩京不苟涉跡權貴人之門間暇恒與文士知己觴
酒賦詩其襟宇灑落於利泊然所著詩文有詞林稿
南行稿梁園稿

襄府長史周君孟簡墓志銘

王直

太宗皇帝改元之初詔天下設科取士明年二月
親策于廷其第一人得永豐曾祭其次則吉水周述
周孟簡從兄弟也 上爲之喜親批其策以示褒至
以二蘇期之而周氏兄弟遂名動天下天下之士皆
舉歎以爲不可及時孟簡亦拜翰林編修又與二十
八人同讀書禁中孟簡神清氣和心淳而志正其學
務求聖人之意而爲文必本諸經博涉於諸史百氏
朋輩皆推重之旣而與修永樂大典屢承賜賚正大

宗皇帝幸北京 仁宗監國雅知孟簡凡有纂述必
使與焉皆稱旨由是寵眷日隆遂擢爲詹事府丞以
自近益恭謹不懈及卽位大封諸王以孟簡爲襄府
左長史盡心輔導每進講則惓惓於忠孝以及於仁
民愛物 上聞而嘉之王亦甚敬禮焉及侍王之國
長沙尤篤慎於其職必欲毫髮無違禮宣德庚戌閏
十二月二十八日得疾勢劇甚王亟督醫治之弗效
翌日而終王深悼歎親撫其子景亮以慰之遣伴讀
周原歸其喪嗚呼非學行之懿乎信于王其能致是
哉予初從孟簡取進士同學古爲文辭又同官翰林

交處幾三十年相好如一日其孝於親友於兄弟睦於姻族和順於鄉鄰至其爲官善事上撫下而信於僚友豈獨予知之夫人莫不知也其行之著內外如此非篤厚之君子歟周氏本吳太尉瑜之後由廬陵烏東徙吉水之憊坑又徙今之桑園世爲衣冠之族平生謙慎不矜與人處言語煦煦未嘗有忤及教學者則懇切詳盡必欲成所著有急就橐西垣橐兩京吟橐若干卷年五十三

衛府右長史楊黻傳

實錄

楊黻字民服由進士擢四川道監察御史練達如素習臨事揆理務當于公仁宗皇帝嗣位下詔求言黻上疏論敬天勤民崇儉戒奢等十事多見采納遂擢衛王府右長史日以詩書進說隨事開益皆出于正裁處庶務粲然條理其僚屬以下咸心服之至是卒平生孝友嚴于自守家貧未嘗苟取一錢博學好古進修之志蓋至死不忘云

鄭府右長史賴君添貴墓志銘

楊士奇

正統六年八月十五日鄭府右長史賴君沒於家其子翰林編修世隆求余書墓上之石賴之先自江右徙汀之清流世有科第高祖諱寧曾祖諱霖祖諱季宗考諱福興皆不仕長史君諱添貴字景明號澹菴生辟而孤母陳育之訓之長而悟解穎敏從學縣博士兼通書春秋禮經工爲文章永樂乙酉選鄉貢明年會試禮部中教官選授浙江麗水縣學教諭九載以績最陞教授需闕言於朝願仍就教諭從之除仁

和縣學九載績又最當陞諸生列狀乞留會簡陞鄭
王府伴讀侍王之國鳳翔每長史缺卽命署其職事
鳳翔學者率從之受經其仲子世隆官翰林得封父
母君授素職就封之例王重其去卽舉奏爲右長史
從之授奉議大夫無幾丁內艱去旣服闋以疾終於
家享年六十有二君爲人坦直存心忠厚孝於親友
於兄弟睦於宗戚誠於交友以恭遜居鄉黨以詩書
行義成其子以致知力行勵學者而施教孜孜不倦
恒躬率先之學者後多由科目擢要官有名于時其
待諸生如子有爲怨家誣構郡守惡其抗直將黜爲

吏者君力爲直之有負官租不能償者剝囊代之償
前官所收廩米歲久腐壞有司責守廩者以償民窶
不能應將自經君捐已俸代償益於排難解紛周急
濟乏率謂當然其在藩府也從容正道隨事獻替甚
爲王所重平生財利一芥不苟取處事必當理朋友
死無所歸盡禮葬之隸人斂土築垣得白金一器有
告君請分之者不聽悖義遺利繁類此其學有本源
所著有經義若干篇古文若干篇詩若干首存於家

淮府左長史李伯嶼傳

子澄清附

郡志

識姚
文敏
於少
年

李伯嶼字君美上海人宣德丙午鄉薦歷桐廬山陰
訓導秀水安福教諭其誨人一以道義諸生貧而好
學者衣食之或不率教雖束修之饋不受桐廬累舉
湖人伯嶼至識姚文敏公於少年曰一夔足矣授以
春秋未幾獲擢第山陰學或傳風水不利科目請徙
之伯嶼曰顧師弟子教學何如耳卒不徙其後仕者
相繼陞淮府左長史從王入覲左右請他求伯嶼不
可曰君臣之間有錫無求求則瀆瀆則不敬府使人

入貢道與一縣令構爭詔下令于獄而釋使者不問
伯喚請治之以戒生事官校有犯王械寘于市伯喚
請論知律以全其生王有疾左右請施僧祈福伯喚
謂不若貸丁役錢以甦衛士王皆從之成化癸巳卒
年六十八所著有文翰類選一百六十三卷行于世
二子澄清並登進士第澄字希范終福建左參議恬
靜有守不競榮利有古人風清字希憲終湖廣右布
政猶介有志操始終清謹官南京刑部時除母喪謁
選尚書姚夔以其父舊恩欲留之清謝曰荷公盛意
知者謂公自薦不知者謂清有所于也姚歎曰希憲

眞君子哉在兵部議儀眞守備獨薦都指揮鄒勝一人清白請用之推此類可見

遼府右長史楊公述墓志銘

許彬

景泰甲戌九月十四日奉議大夫遼府右長史楊公以疾卒于官距所生洪武甲申八月得年五十有一其子禮科給事中清詣余泣拜請銘按狀公諱述字宗道姓楊氏蘭谷其別號也其先本漢太尉震之後先世仕宋扈蹕南遷因家桐鄉今爲桐鄉人高祖茂曾祖懋誠祖德順皆不仕父禎字希孟配姜氏生公自幼天資穎敏經書子史過目輒成誦自童州時已有聲出儕輩時郡守淮陽齊政教授儀真陳立皆奇

其為人而獎諭甚至甫弱冠以書領兩浙鄉薦第一
人試南宮連不第而竟登名右榜授宜興司訓恒自
嘆曰士之仕將以行其學也吾能推其學以淑諸人
所得多矣乃欣然就職宜興士習素務記問而經傳
本旨多不之講科第常乏公至一新教條誘掖諄切
士之務本至于今登名科第者後先相望滿考陞湖
廣監利教諭而施教之法一如宜興講下諸生登臺
省者蓋褒袞也監利荊州屬邑相去幾三百里而郡
守劉勇嘉公之善學善教簡郡庠之聰穎者就學于
一果取一第正統甲子秋膺聘幣試川蜀途次有持

錢場
元卷作

白金賂公求中選者公正色拒之既入院言于監臨
主守臣曰朝廷設科重在得人苟去取不公罪在我
輩脫防範不嚴公等何辭閱將終其全場者多不相
稱而解首乏人公簡減場一卷曰此作辭理明贈筆
力高古當冠多士既撤棘乃長寧周洪謨明年洪謨
果登春榜而廷對第二人蜀人至今稱公藻鑑焉歲
丁卯當大比上命彬主試閩闈而同考校幣聘者
五人公其一也公考詩書二經晚得一卷欣然持以
告余曰此榜首也已而闈諸卷莫能過之及折卷乃
莆田陳俊也明年果登進士高等今爲戶部主事公

學博氣充侃侃持正論于同事者少許可獨以余齒
少長頗推讓其年策問潮汐盈縮之由監臨官有議
之者曰此題當試浙藩士子彼謂浙江有潮公應聲
曰潮生于海天風海濤考亭朱子所書何以不在浙
而在閩乎况理無往而不在士無往而不學議之者
慚而退景泰辛未以九載滿會遼府長史缺員 朝
廷崇重親藩慎簡輔翼遂陞公今官到官日罷冗食
之徒別土田之界且力勸世子務學讀書王用嘉悅
王素好賢樂善自以爲得公之晚公亦蹇諤自持隨
事諷諫多見嘉納嘗手書公正二字賜公公拜謝曰

臣敢不祗奉教命比得未疾王時賜藥物命醫治療
疾劇鶴馭親臨其第慰諭久之及卒深加悼痛贈
優厚有蘭谷集二卷藏于家

楚府長史李公顯傳

崔銳

李顯字道彰安陽人成化丙戌進士授翰林院檢討
事吉王後拜長史再改楚府弘治辛亥卒年五十一
顯介特有志不輕下人士舉進士卽圖陟要地富貴
可契致而長史終身事藩邸當選授時多稱病避或
託貴勢請免顯曰士筮仕卽擇便利邪必如公等顧
令王孤立乎往就選果用在楚府放逐豪猾管田稅
改令謹厚者掌奸人訟指揮于某受賕顯直其罔某
夜持金謝顯叱却之顯居鄉村時歲大凶日以糜藥

名
然儻暨病者在楚歲又凶出俸金寄親戚少與張文
友文死顯葬之事其兄與文從顯遊者爲徐憲最印

興王府左長史贈太子少保禮部尚書兼文淵

閣大學士謚恭僖張公景明傳 顧 璘

張景明字廷光號葵屏浙江山陰人也幼聰慧日誦千餘言年十二三補邑庠弟子員成化庚子登鄉試庚戌錢福榜登第時 睿宗皇帝初開藩邸長史馬政輩以不職罷 孝宗皇帝命吏部擇可爲代者尚書王恕郎以景明爲左長史袁宗皋爲右長史人多惜此兩人不得他用者景明曰賈誼董仲舒不有聞於時乎忻然入謝 睿皇於諸王館諭之曰卿等皆名賢當大用今屈卿爲輔幸共勉勉以善聞於世耳

景明等頓首謝明日上疏勸 睿皇正心謀學以周公及漢東平河間爲期深見嘉納又獻爲善最樂詩以寓規諷 睿皇賜以金帛居數歲從之國詔賜正四品服國中事無巨細皆經畫有法上書陳六事

睿皇優旨荅之仍賜金帛久之又上廣胤嗣通恩澤厚風化養心源屏左道免括增田六事 睿皇稱善

歲丁卯以憂去 睿皇奏虛其缺以待越三歲返國 睿皇晏駕 今上爲世子方在諒陰令攝國事中

外蕭然景明尋病力求去 今上慰留有忠厚清真之衰病且死謂所善大學曰死何足恨但嗣君幼冲

不得終輔之以酬光王厚德耳遂卒卒之旬月上
入繼大統時人皆贊景明不得六月於中興之朝也
追贈太子少保禮部尚書文淵閣大學士謚恭僖子
元恕廢光祿寺署丞元蒲廢太學生

岷府左長史薛先生端行狀

梅純

先生姓薛氏諱端字士莊先世河南孟津人始祖友
諱元末兵亂從戎尋歸於國朝洪武初分設軍衛遂
隸籍留守左衛之千戶所永樂中以京師分調北上
而先生之祖適在留籍故子孫今家於南京越二世
至先生之父安家始稍振已而生先生眉宇秀異白
晢瑩然如玉當成童時叅將表公估方爲衛帥一見
而奇之曰是兒狀貌異常豈宜屈於凡流促令業儒
未幾補京庠生學日加進時提學御史嚴銓性苛刻

案部所到諸生輒被楚撻無虛日京師因有投匿名
謗書者嚴意必出學校欲重加罪乃先試以士增茲
多口論時同試者百餘人獨先生之作詞理明暢中
寓辨解嚴意乃釋因第以優等衆亦獲免先生於是
益加砥礪凡三應試乃領成化辛卯鄉薦明年壬辰
復下第歸尋丁父憂墓祭之外謝客不出閉門讀禮
而已太原周公嘗延先生授子弟經業至是陞刑部
尚書與先生居甚近公屢致問先生竟未嘗往謁其
守禮之確類如此服闋又兩會試始中戊戌乙榜拜
山東莘縣學教諭莘俗士子素好訐把持官府久乏

科名先生乃舉甚者一人呈所部以寘於法風始稍
息先生擇其英俊者十餘輩躬課其進故任內中舉
者凡數人皆先生之教也弘治改元陞南京國子監
博士盡心供職亦如在莘學時辛亥三載考績賜勅
封修職佐郎甲寅陞岷王府右長史善於輔導不爲
諛佞王嘗宴羣臣令各歌唱侑觴先生曰臣待罪輔
相恒懼迂鈍有孤祿位遑暇習歌唱邪王爲之改容
且賦詩彰其直壬戌進左長史乙丑引疾歸今上
皇帝嗣位進中順大夫秩四品服緋帶金鄉間榮之
正德丁卯十一月十四日以疾終距其生正統己未

十月十七日得年六十有九

淮王右長史李公勳傳

羅洪先

懋齋李公者吉水谷平人也名勳字功大吉水李氏谷平最著先世多顯官而公曾祖仲和爲會昌訓導仲和生從遜從遜生卽溫卽溫爲人長者少敦貞介之行年三十不知卜婚里人號爲拙隱君後娶蕭氏生三子而公在仲少微吃兒熙數苦楚之間不速對輒捫面固不容啼泣也母見面噴赤疑曰兒汝捫耶白無也於是家人莫不憐公拙隱君賈懷寧有息產公因留爲懷寧弟子員是時年且三十有一同舍生

咸以課業推公及背誦諸經子書無遺字其餘貫肯
祭悉有口傳屢爲督學御史賞識比鄉試輒忘試目
坐是竟不一遇又二十年以歲貢上禮部而拙隱君
年又甚高求便養得河南新野訓導訓導故不得抗
學論督諸生諸生課業旣無口傳每試教論未有知
摘摘者公乃日夕爲說書正課業人人聞所未聞卽
有品評一一皆當莫敢背語有勤業者助膏火夜且
具食勞之於是教諭讓服而諸生亦競文相高舊習
一變新野久不舉鄉試陰陽家指學官倉儲爲解會
御史戴忠行縣公白徙倉未幾諸生蕭聽齊雲相繼

舉而新野地易歉市妖游食甚衆公病之號於衆曰

教化所以開風俗風俗不經教之辱也今聚倡佞誘

無賴爲奸汗諸生行有樗蒲蹴鞠射住能傾人家夫

民性若水易下也耳目染濡將室家奔潰敗產廢業

父兄何利焉其共逐之隱弗告者治如法未幾奇衮

爲之越境而徙公故爽健善濟事成化乙巳河南大

饑流移載道令不能抹公捐俸施粥待之多所全活

嘗攝縣朝廷遣中使禱太和山沿途怙威索賄公一

莫應且嗾縣民挽車訴貧中使懼夜遁去當道數廉

其才而公亦以九載當代至京師考最陞永豐王教

謂訓
遂奇
表
司訓
施濟
殺荒

通議

授承豐懷願王者賢王也文而下士往時衛教授老
而罷教王諸子無狀數蒙詬詈及見公豐願長揖肩
背負鍾衣冠甚偉乃大喜謂諸子曰李先生真教授
也而輩無若視衛然公朝王從容援古今賢哲事爲
諷王亦從容引謝退必起送盡階乃已未幾懷願王
薨而長子嗣主不敬喪公爲書以諫其略曰臣聞三
年之喪天子達於庶人無隆殺者本人情也今王喪
未期而飾衽輿馬國人駭嗟臣竊悲先王之盛志不
續矣臣聞祖訓者 高皇帝所以保佑後人慮至遠
也今有十金之產猶思念其祖父獨奈何至身犯不

諱乎夫御女太早則體不內充馳馬逐獸則氣狂奔而易竭內外交傲欲求永年猶膏自焚而焚之薪也茂不燼矣且制節謹度滿而不溢者諸侯之幸也今王歲祿不增而賜予太濫薄視先生親戚婚嫁不時宮室蕪穢殆未可以聞于上也臣愚謂非痛抑而力改之不可以保國謹上十事一曰法祖二曰厚倫三曰勉喪四曰親賢五曰遠色六曰謹玩好七曰絕射獵八曰馭下九曰別嫌十曰節用惟王財幸焉書上王頗悔悟而公亦有拙隱君喪將告奔王曰嘻吾可一日無先生乃上教授善狀請無注代而自給半俸

不
入門

終喪公傳王十六年宮中事無弗與聞後王禮意稍
衰公覺之棄官歸王弗能留念公勤勞請進階淮王
右長史致仕復終身上從之公家居十五年族戚
無少長莫不敬憚公公正容體謹言笑性峭直喜面
折人人有過多自掩匿懼相聞後里中盜起白晝殺
人過公門呼曰公幸無恐我輩何敢傷善人遂巡引
去

洪先曰余侍先大夫自敘初婚時事恩公至厚也公
治家有法教子女嚴而正當是時納幣之禮甚儉不
計也顧日督其課業已又令習禮容舉足出言緩急

有則自居室食飲莫不告戒二年而始予婚葢終身
父視公云而余見公則釋也多授以趨走唯應諷誦
書札諸節目且執其手曰汝必爲大丈夫幸毋忘我
公卒十年而予待罪史官無能自効公諸子孫願未
有成公志者嗚呼悲夫公之治家善盈縮遷化累貨
數千金以是義發任事多捐俸不自惜晚年聞諸僮
奴噉宿糗輒涕下不忍見今子孫貧甚宿糗日且不
充幸公不及見耳嗚呼悲夫公居室常觀曆酷類數
仁所爲一得壽考然鄉人往往因公子孫之貧咸疑
天道福善不甚驗解之曰屈伸盛衰數有適然者雖

聖賢不能違吉凶禍福理有固然者雖聖賢不能必知其不能違也故未可擇所遇於外知其不能必也故未可易所趨於中何則斯二者皆天也由是言之公之至斯極也卽謂之天道亦可也又何疑

秦府右長史梁先生溥墓表

崔銑

弘治庚戌春先南郭君守延安入覲已事言于太宰
三原公曰郡游荒之後士大廢學無良師焉爾請選
省試中乙榜者習學職三原公曰守言良是命選司
識之且擇其優者往夏諸君懷檄至教諭延長則鄭
人楊懷思善甘泉則崇慶李先生諱徙字子乾清澗
則陽城張緯大張延川則我時齋先生諱溥字德宏
訓導府施則廣安蘇森茂之綏德則中江彭萬里澠
亭閻中揚泫惟深先君咸賓之俾大敷訓十餘年間

延安科第遂與西安伍先生純心重義。訥言敏行。不
爲華貌。徇詞善。朱氏詩發意。指物章。權字鍊爲文。馴
與雋永。味長。旣教延川先君。又令署篆郡中學。以教
他士。銑甫成童。獲執汛掃之役。又署延川縣事。平賦
簡訟。郝氏起大獄。無能決者。先生鞠其實。悉刑之。其
兄弟叩神誣訕。旬日兄弟死于瘟。任將九年。丁外艱。
歸鄉里。諸生別皆哭。失聲。服闋。晉南監學正。再晉慶
府右長史。乞歸養。不遂。遭母喪。後寘鑄。叛逆。瑾。矯旨
。請贖米四百石。人謂以米價之半。賂瑾。則免。先生竟
輸米兩治喪。遵行家禮。服闋。至吏部。冢宰遂菴曰。此

生在指陽爲我賢徒在秦爲我良屬在慶府爲剛傅
不以憂還冥鑄無變矣補秦府右長史先生操履修
潔臨事介直自王以下咸敬信念長安李盤嘗訓導
稷山歲往祭仍累其妻子以其服修稷山志徵實明
典示政學之矩不幸遇疾而卒正德丁丑正月十有
一日也享年五十有五疾革作遺命曰爲吾後者其
讀書以明道安分以養德其仕者勿擾民而剝之勿
厚殖產驕情其子孫

襄府長史林先生光墓表

湛若水

周公而上其道行孔子而下其道明其道行者其言
微其道明者其行緼是故明者其體平行者其用乎
白沙夫子崛起南方沂濼洛之源以達于洙泗慨然
任明道之責當是時得其門而入者惟南川林先生
一人而已矣南川靜坐清湖餘三十年玩心神明默
契大道其質於師之言曰元來四方上下往古來今
直是一箇充塞周洽無些小欠缺無毫髮間斷無人
我大小遠近如一團水相似都滾作一片又各飽滿

無相干涉前輩謂堯舜事業亦是一點浮雲過目今始知其果不我欺實見得則所謂充塞天地之間所謂天地位萬物育所謂建諸天地而不悖質諸鬼神而無疑百世以俟聖人而不惑所謂至誠而不動未之有也所謂洋洋乎如在其上如在其左右與夫高宗夢說之事朝聞夕死之說方各有着落曾點三三兩兩看來自家多少快活何必勞勞攘攘都不是這箇本色千古惟有孟子勿忘助之語最是不犯手段也斯不亦見道之體乎然而言則精而行細矣先生事竹齋府君如事天其事游太夫人如事地故孝敬行

於家庭孳於族鄰聞於巡撫巡撫朱公爲勸駕焉中
乙榜教諭平湖遷教授於兗州再補嚴州所過士習
以化而師道尊破規條之說而重以身教化舉業之
陋而合於涵養去支離之弊而究于一本薦紳考德
收爲襄府左長史正國法肅官僚憚奸佞清官禁
立體統一府大治及其旣老以禮而退能以正終故
方其隱居清湖也人曰未可以仕乎曰吾方求吾志
也吾何爲而易諸及其仕也人曰未可以止乎曰古
有爲貧而仕者乘田委吏所不辭也吾何爲而去諸
新不亦見道之用乎然而行則緇而道明矣甘泉子

曰夫道體用一原者也。管者孟子稱伯夷伊尹柳下惠孔子之聖於伯夷曰治則進亂則退於伊尹曰治亦進亂亦進於柳下惠曰不羞汙君不辭小官於孔子則曰可以速則速可以久則久可以處則處可以仕則仕夫聖之為德亦大矣而直於進退仕處久速之間言之何耶。明體用之一原而變化不居也。故即用可以觀體矣。卽體可以觀用矣。卽體用之全可以觀人矣。南川先生之學其盡亦以是觀乎。若其贊述存乎文詞其行實存乎家乘。余持撮其大者表而出之。庶來商有觀焉。先生諱光字緝熙子二人長時表。

醫學訓科次時衷鄉進士能繼家學從子遊語子表
于墓石

崇府左長史黃君琮墓志銘

顧璘

君諱琮元質其字也先世本撫州樂安人系出山谷
後裔大父伯夷公有四丈夫子共季曰度浩君文也
娶柳氏居樂安既生二子曰瓊曰瑛成化間應闈右
之役來南京觀都會豐熾曰此弗宜居乎乃附籍上
元已而曰吾忘吾鄉乎仍號望雲以見志故上元之
黃氏自公始居六載而生君穎秀絕出逸而多韻補
應天府學弟子員間作平蠻金陵二賦文譽騰起舉
弘治乙丑進士遺蔡修湖省 孝宗寶錄歸拜青州

令時逆瑾圍國批政蔓作君舉意高遠不規規與俗
俯仰適忌謫長樂學論劃然嘆曰所不足於縣令者
果予也夫教吾所樂也乃陞堂講授期以其學傳諸
弟子及瑾誅吏部檄君爲郟城令時盜寇山東城惡
弗可備君至二十日而整成又三十有四日門圍完
民恃無恐謂山東之困弊於馬著馬政二篇行於官
作問官祠祀孔子及鄒子自爲記大抵欲學者知孔
子之聖由問學至也陞橫州守益練牧惠之體民無
隱瘼得秦少游海棠橋址於荒墟乃拓置堂宇以風
起夷俗搢拜岷府左長史以柳夫人年高再疏乞養

侍奉之暇灌園藝圃泊如也及柳夫人卒致哀盡禮
且痛望雲公先喪時貧不得爲悅合室爲若堂之封
服閔直 今上繼統謂王傅宜重故君復有崇府之
命方挾汗振頰輸其嘉猷昊天弗吊中道摧頌嗚呼
哀哉夫文與政弗兼久矣君抽思則藻展事則練其
可謂通才者與然用不副才年不副用斯天之靳也
唯文燁燁可以永世所遺詩文若下集曰宗說曰求
志稿曰行義稿曰楚征日錄曰青田稿曰謫游稿曰
郊城稿曰嶺南日課曰續課曰東歸稿曰乞養堂稿
生于成化庚寅十二月十九日卒則嘉靖甲申二月

十七日也子二伯嘒仲牧

徵王府左長史吳公稷墓志銘

陸樹聲

嘉靖四十二年八月二十二日石湖吳先生卒郡邑士相與咨嗟太息曰耆哲逝矣已而督學麻城耿公弔其廬出先生遺編讀之廼采士議躋祀先生於鄉賢嗚呼先生所謂有道君子也諱稷字舜弼學者稱爲石湖先生幼穎敏長凝重端慤見者偉之年十五執父喪如禮已治經屬文名籍起爲郡守宜春劉公督學莆田陳公所獎識弘治辛酉以儒士應試明年補郡諸生正德癸酉領鄉薦甲戌第進士謁告歸上

築城東杜門績學著清望丁丑上銓部授金華府推
官未幾調惠州嘉靖甲申遷荆王府左長史己丑進
四品秩庚寅疏請侍養丁內憂乙未除服改徽府己
亥先生致仕歸先生敦行藹古於吏治鮮緣飾然筮
仕金華以廉慎稱比讞詳恕屬邑永康武義民囂訟
先生嚴法禁移其俗武義林丞有年者以諫左官爲
民構誣力白之真豪民犯令者於法坐是拂上官意
移先生惠州始至署郡篆裁冗僭革濫役疏繫囚置
規過愜於門立保甲以調盜中丞聶榮襄公下其法
於諸郡博羅民以嘯聚伏法治者林連賴先生辨釋

獄解海豐令某以墨黜恃援視事故露檄逐之去兩
輔親藩引誼規正進賢王箴共窗賦以寓諷尤嚴憚
之其慎職類若此平生銳意閩洛之學在金華日謁
章文懿公於家因事請益及來惠州莊渠魏恭簡公
以督學至敷教迪士尤委重先生而谷坪李先生會
言事謫丞通衢惠屬也相與研析道妙徵詰異同久
之有得因梓行二先生所說式諸士致力於閑邪求
仁以弘體驗自謝事歸著書談道非公事不入城府
有司延鄉飲大賓間一赴之布衣糲食頽垣敝宇處
之充然居閒宴坐一室扶策伊吾意得卽口占一咏

惟陶寫性情不若詞人琢句爲工也家庭雍睦萬倫
理推先業以居從兄逆養寡姊終其身月且望夙典
謁先祠遇時祀必齋戒致虔罔寒暑間接人盍晷可
親至審義利不苟一介鈎距逆億米鹽握篲之事一
不經意而鑽研問學不愒寸陰歲癸亥先生著行壽
編見者以衛武公抑戒擬之未幾先生逝矣先生生
成化壬寅二月九日享年八十有二平生所著有自
得圃稿宦遊稿石湖湯稿破愚錄史綱纂要藏於家
而皇明正學編尤禪道脉云先生生而近道薄嗜好
禠身清白步趨不越繩尺自登歲力學暨游嶺東切

礎於莊渠谷坪二先生參互考證既而谷坪往返虔
臺悉所聞於陽明致良知之說以相剖質先生潛思
密會究其指歸益服膺四十餘年而要之所得於深
造默成則求仁之功居多予嘗侍先生見其氣貌淳
厚語訥訥不出口至誦說理道稱引當世名輩言纒
繼使聽者興起郡中士諺理學者自先生始先生尤
善引後進孳孳不倦予與楊太常朋石習聞先生教
先生折輩行與之交先生既葬朋石爲狀而余爲志
銘

德府左長史周公積行狀

趙 鎰

公諱積字以善別號二峯其先世淮右人高祖曰真者國朝初開科貢以邑庠生入太學上舍慕江山石門之勝始定居焉曾大父盛種德績學爲鄉塾師生二子長亮以子貴贈承德郎南京刑部山西司主事次蒙卽公父也以公貴贈文林郎江西南安府推官妣祝氏配毛氏俱贈孺人主事公子曰任者於公爲伯兄登弘治乙丑科進士累官至梧州府知府號元峰元峰文望蔚爲時宗公幼受業家庭稍長慨然有

志於學元峯心異之挾公偕游蘭谿章先生之門後
之官莆田復遣公受易學於晉江蔡先生二先生當
代大儒盛有所稱許公歸自晉江遂以易學擅于鄉
歲庚午領鄉薦次年卒業南雍聞陽明先生倡道東
南亟師事之初聞知行合一之說不能無疑及先生
反覆示以立誠之道且悔且喜遂超然有悟今傳習
錄所載贈周以善歸省序則先生與公論學之詞也
公之歸也日以所聞於先生者啓迪後進一時及門
之士如今方伯東溪徐君邑侯陽溪林君學正西山
王君成彬彬焉吾邑自徐逸平先生倡道之後寥寥

數百載士之向學寔自公始嘉靖丙戌謁選吏部授
南安府推官南安地接徭種民俗刁悍未易爲理公
性明達長於聽訟數十年疑獄一見立斷民服之如
神期月聲徹當道擇縣之劇者試之署公治縣專以
德化爲先刑罰次之有古循良風政暇則名諸士之
茂異者相與講明先生之學雖寒暑不輟至應盤錯
紆綆糾尤綽有餘力以故邑政必舉凡南贛兩郡十
四縣之缺令者咸於公平署丁亥秋先生將大軍征
思田取道于贛經大庾公適署縣事供給調度務如
蟬葉公從容酬應靡不贍舉人咸服其才卽如夫馬

賜
給
夫

一節有司以冒領為憂公製為方員牌數千以進曰
詰旦有方牌者給馬一員牌者給夫一由是軍士不
敢冒領而所省甚多先生甚喜下令兩廣傳以為式
戊子冬再署南康適先生自廣班師得疾公迎候謂
之曰汝在此吾心安矣繼疾亟召公永訣公泣曰復
有言乎先生微笑曰此心光明亦復何言公躬親殯
殮心喪三年如一日焉蒞南安凡六載朝夕恒惟殯
越師訓是懼故治行表著乎於上下癸巳考績蒙
恩贈父母如已官仍陞湖廣辰州府沅州知州公之
治沅一如治南安大抵興學校崇禮讓剔政蠹賤蒙

右斥姦究一時湖湘數郡之政咸首稱沅州而沅州
之聲蓋縈縈騰薦牒矣巡撫東橋額公書之曰嚴整
剛決廉守公勤司諫海石錢公書之曰貌古攻亦古
跡愚心匪愚公以爲知己因自號古愚己亥遷德王
府長史辰沅倪毫咸涕泣遮留莫可得剋相與立石
于七里喬松之下曰此我公往來所常舍也其甘棠
之愛永繫民心如此是冬公之德府王素聞公名虛
已以聽公亦矢心匡輔每進講必納約自牖色溫而
氣和啓沃良多王心嘉悅特奏其持身端謹輔導恪
勤保陞正四品服色再踰年卽有歸志時子適觀風

濟南謂公王魯公厚得無少須耶公曰四時之序功成者退吾敢忘漏盡之戒乎遂浩然而歸時年方六十九君子謂公之相齊也無愧于仲舒而其見機也有先於二疏矣既歸徜徉山水足跡不入城府歲時名故老燕飲娛樂處鄉黨坦夷平恕無少長無親疎戚煦煦然相接也待之以尤有恩而貧乏者待以舉火待以婚娶歷歷可數某歲大侵亟令子弟減值而難以濟貧民或輒與之粟無德色焉與人交出肝膽相示平生不言人過而至於有犯者亦退然弗之較也鄉評嘖嘖稱之爲萬石君下至庸人孺子亦呼之

曰積善先生積善先生云公善攝生無聲色之奉嘗
自稱漠然道人年踰八十猶屹屹如壯夫每日黎明
起謁家廟退居省心亭焚香前坐潛冥冥思會有所
得卽書之于冊每月有日錄一本以驗進益今藏于
家性喜講學至晚年矯其弊語學者曰爲學如治病
有病須服藥徒講藥方何益學而不身體力行是徒
講藥方之類也人以爲名言生于成化癸卯三月初
三日卒于嘉靖乙丑二月十二日享年八十有三葬
于寶峯山之原乃公自營之壽藏也

左長史南溪孝子趙公德民墓志銘

李元陽

公諱德宏字有容南溪其別號也先世爲家詔人有
趙鐸車者於公爲始祖後有諱堅者生連連生護護
爲鶴慶路知事陞北勝州判官酷好清淨辭職不赴
作菴以居遂爲鶴慶人護生春春生應應生敬敬生
遠贈奉直大夫配李氏封太宜人人生公公之少也家
甚貧所居隘陋公能勤儉增拓居室以安二親父除
江西按察知事奉差人京病痢公日嘗糞初覺糞苦
旣而甜知病且不起慟不自禁及父卒假貸營殮借

備人有柩以歸踈踈萬里無一日輟備人見其書生
任勞爲之感動既歸廬墓三年朔望日回家省母省
畢卽歸墓所墓隣獾夷豺虎交跡寂無人到忽有一
白犬來守其廬郡守汪公標聞而異之躬至墓所慰
勞饋贈有加焉乙亥服闋丙子領鄉薦巡按御史唐
公龍廉知其孝自慶得人因以其孝行上開榜其居
曰孝子趙氏之門謁選授順慶府判府有疑獄三案
皆死刑久不能決公至郡守輒日之使訊公一訊而
決洗其寃者十餘家會歲歉賑濟公設爲方畧全活
甚衆掩瘞暴露無間遠邇巡按御史邢公特薦大加

仲
休
荒

襄美臺省獎勵之使相屬於道三年遷潼州知州公
初至惟以備荒爲志凡贖鍰自一錢以上皆令買粟
貯倉居二年得粟萬八千石明年蜀又大饑死相枕
藉潼州以發倉得免州圯數十年莫能築公謂倉廩
雖充苟無城郭民誰與守遂力主其議躬率耆紳糾
情獎勤朞月而竣事先是凶歉之後民半轉徙公至
能勞來安集復業者日益衆州當衝要走遞馬役大
爲州患官損其名民喪其業公於州門作廐六十楹
聚馬而飼之以次輪役匪直革吏弊緩民力卽馬畜
皆得訓適之節民大稱便州之三溪口富斧井諸處

盜賊依山阻險拒捕殺人其來已久公至設保甲立社學四十餘所親至其地開諭善道不旬日諸盜自縛渠魁而來敬聽約束自是境內晏然嘉靖十二年勦漢二省土夷爭界撫按以公素行爲鄉評所推遂檄公勘治有上舍高鵬者以白金八百兩爲饋公力拒之土人愧服遂各吐所爭地兩省並加獎薦由是聲實益隆矣方陪點河南僉事會慶府缺長史今上方重宗藩而慶府宿膺眷注銓司慎輔導之任因以公爲左長史公至以本藩舊事奏聞勅放藩宗室家者六十人公爲長史六年乞休之疏凡七上竟不

得請庚子丁內艱慶世子親賜吊慰諸藩宗戀戀不
忍別雲南巡按御史包公節白公賁再旌其門曰孝
廉公爲人樂易正直與物無忤宦轍所至僚吏士民
無不傾心初在潼州還勘爭界事時百姓恐其長往
相率二百人詣撫按保留扶老携幼不遠千里若孺
子之念慈母何其得民之深也詩曰有匪君子民之
不可諼兮斯人之謂與公以弘治庚子十月二十日
生以嘉靖壬寅十月初二日卒享年六十有三以明
年十二月二十日葬於象眠山

慶府右長史王公允武墓志銘

余繼登

棘亭王公以慶府右長史致仕歸歸二年而卒卒三
十年而公子大理左丞世揚以侍御馬公狀謁繼登
請銘公墓道之石王氏之先本山右人其先世有諱
貴者自山右徙居廣平遂爲廣平人貴生柔柔生玘
玘生友友生臣臣攻文章有大志竟以諸生齋志而
歿娶于張有二子次卽公也諱允武字殿邦別號棘
亭公生而敏惠才質過人長厲志讀其父書爲文儻
朗多奇氣旣隸學官每試輒冠其曹性嚴重不與言

伍卽其膏亦帖然成服之顧數試數不售晚乃以明
經入太學嘉靖庚戌謁選銓曹除江西南康府通判
南康地故瘠薄而俗善通賦每郡吏督賦者至黠者
輒醉金錢前爲壽一入其賄卽噤不敢問以故賦恒
適多者或至八年公廉直不受私謁旣視事前行人
者徘徊門下不敢入公乃名諸逋者按緩急爲期而
遣之諸黠凜凜以次輸無敢後期者部使者奇其能
疏聞于朝爲下墜書褒予之會守缺卽以公攝守事
時粵西狼兵調入剽倭者所過橫甚百姓患苦之以
次堂至南康郡人甚恐公乃預爲檄檄其渠率曰以

爾剽倭奈何乃自爲倭今與爾約餽餉不時罪在有
司餽餉時而爾橫如故三尺法具在吾知用吾法耳
率已前聞公名旣得檄頗懼而戢其下公亦勅屬邑
爲具以待竟過南康無敢縱者郡瀕湖盜賊之所出
沒舊有游徼船若干艘歲時繕治郡任其費而主者
任其勞守備某匿其費而責繕治于郡公持不可某
恚甚譖公于巡撫都御史都御史怒公廢格爲停公
月俸公乃徐條故事暨所爲侵匿狀上之御史內
媿公卒褒公治行爲江右第一饒萬年令某以腹削
機兵月糧爲所訟讞者受賕右令而重繩所訟者衆

兵怒遂軟血以叛饒郡戒嚴時直指徐公方行部至
饒倉卒無以計適公以它務至徐公喜曰王別駕來
事其濟乎卽令公停它務而撫亂兵諸亂兵聞公來
亦相戒無動王公治我吾屬當無患矣前讎者謂公
爲地公不應旣繩諸亂首而令亦論如法衆心始安
直指益奇公卽以公署萬年事公更約東廠稽覈省
一切煩費鹽米瑣屑一取給于南康壯兵某訟其隊
之長而所株連甚衆公心察其冤爲爭之御史竟反
其獄萬年民頌之詳見浮梁金公所爲去思碑中公
治萬年凡六月以考績赴闕下民攀留不可得則相

與國公像尸祝之公既以最聞名益起復移公景德
鎮書陶事公愈孤立行一意自貞額外諸造爲淫巧
以賂遺權貴人者槩從禁絕歲省工費數千百緡景
德人德公如德父母浮梁尉某以巡徼至鎮而縱其
微卒有所剽取民不勝忿鼓譟圍尉將甘心焉尉恐
避匿公署中公爲尉慰民民乃解散去庚申陞兩淮
鹽運司副使公日講求利弊擇所爲通商惠民者佐
其長次第舉行之或有諷公爲囊橐計者公峻詞以
謝其人愆而退都御史駱某以嚴相私人得總海內
鹽政大以賂聞鹽政壞亂淮商黃某鳩金數萬將逆

諸境上公廉得其實至置諸法淮陽鹽賦甲天下都
御史視爲外府比至無所得大恨公會公遷慶府右
長史猶未釋恨嗾所厚善御史伺公隙無所得竟以
老落公職致仕時年五十七耳公旣歸杜門謝客布
袍蔬食無異寒士又論年壬戌秋以疾卒距生弘治
甲子得年五十有九古人有言廉吏可爲也而不可
爲夫廉者任氣多亢厲不能忍人難與共理其不然
者又無能引當否至耗廢官事此安可爲也公歷官
所至常祿外毫不以自污非賓客不御酒肉騶從漱
陋不治郡人見前導不問而知爲公也豈不廉然常

有以自下者蔽人之過且調護之甚厚推其廉平人不忍欺故能片詞而銷兵民之變此非可以口舌爭也仕而俎豆于郡歿而俎豆于鄉有由然矣嗚呼若公者廉而可爲者非耶

紀善

衡府紀善周是修傳

楊士奇

周是修諱德以字行吉之泰和人其先諱矩者嘗顯於南唐至宋累有科第其支裔徙灘江里是修之所自出也是修少孤貧自奮於學從游鄉先生胡清樵清樵以孫妻之又從國子學錄蕭執先生明經初舉霍丘縣學訓導入見京高皇帝擢爲周府奉祠正高皇帝上賓之明年有告言王過失事王府官屬皆下更是修以嘗諫得免改衡府紀善預修纂翰林教

陳論國家大計及指斥用事者誤國用事者怒衆共
挫折之是修吃下爲動 文皇帝靖難之師旣渡江
駐金川門宮中自焚明日是修留書其家別其友江
仲隆解大紳胡光大蕭用道楊事奇且付後事暮人
應天府學經死死六月十五日也又明日臣民推戴
文皇帝繼大統數月御史言是修不顧天命請加
追戮 上曰彼食其祿自盡其心一無所問是修內
貞外和有孝友忠信之行非其義不苟取襟懷坦明
澆落而冲澹悠然其學自經史百氏下至陰陽醫卜
之說靡所不通爲文章未嘗締思援筆立就而雍容

雅贖詞理條達稍暇著述吟味不虛寸晷所著有詩
小序詩義詩譜論語類編廣衍太極圖觀感錄綱常
懿範邇言家訓芻蕘集進思集是修汲汲導誘人爲
善人有過失恒爲之隱以是無少長賤貴皆樂親之
明于知人所薦士如梁用之劉叔法皆知名當世是
修之學雖間未純然於明細常爲世道計必身履之
而不徒託之空言豈非卓然特立者歟是修卒年四
十有九時解胡蕭梁皆見諸文字然屬倉卒不及詳
今二十有八年矣知是修者獨余在每追念君清白
之節 文皇帝日月之明旣照其心豈當遂致泯泯

故遂爲小倖以授其子轅使傳焉

周紀善逸事

郭子章

周紀善名惠字是修秦和人也死遼國之難其大節
聞聞者於史及傳銘與夷齊埒夫人類能譚之惟時
長陵在御臣下楛口時事令紀善一時君臣魚水
之驩鶴鳴之和鬱焉不宣著予於其耳孫如春家得
建文帝手翰讀之作紀善逸事二篇以補史遺洪
武乙亥紀善就聘至京師試翰林院中首選上親
授周府奉祀正紀見王歷試經義文賦時建文帝
爲儲君卽命侍朝夕講讀大承恩眷一日帝御天

穉清香穠午寐夢異人遺以良藥嘗而卜之當得達
人已得紀善懽甚謂夢符也乃書賜紀善曰奉祀正
周是修泰和舉子岡人也性清雅喜著述嘗慕古先
賢行必欲效之詞章清奧雄俊人罕能及予嘗欲求
直臣輔王家藩衛皇室未有其人乃春春午寐夢異
人遺以良藥予嘗之味清而苦其人曰服之可以安
精神定四體延年覺而疑焉命卜之曰當得達人靖
國之徵也越一日本府紀善曾子禎謁予曰泰和一
儒有博學名素懷匡輔未遂共志方今俟銓天官木
濟嗣官乏人得是修職之庶幾可以和神人而裨益

左右于是請於朝授以奉祠既而是修至會 君王
方命諸儒纂集羣書一見嘉其才能命總其事且令
侍子講讀子深樂之而信夢之有徵嗚呼國得賢爲
艱而用賢之言爲尤艱賢遇君爲艱而能諫君以得
君之信爲尤艱今 君王用爾之言爾亦能致匡君
之益上下之間可謂兩盡其道矣昔高宗思賢良而
夢傅說載之於書予以區區之心亦感於夢其理一
也故述其事爾尚勗哉紀善常言其母賢 帝大書
賢母二字賜之又言師胡樵渚賢 帝復書樵渚二
字賜胡之裔乃賦詩一章而自序曰紀善周先生是

修言其母賢因書賢母二字賜之以旌其母之潛德
又言師胡渚樵之行求書渚樵字以遺其後人傳之
久遠吾嘉其慕親又不忘師輒書以賜先生以才能
志節方侍 明廷當以道義文學誨吾吾年幼業未
成先生與同寅協力輔吾爲賢王榮顯於後世永保
名爵共樂太平乃賦詩一首以見吾意趨朝金殿曉
論道玉堂清見爾思親意興吾念母情揮毫彰隱德
題句寫平生尚賴匡扶力從師望有成古逸事上帝一日
檢古樂府中有思媿人題注云君求良佐也作思媿
人賦賜紀善有進烏者帝命放之致書紀善曰子放

鳧在城之塚始舍之雍雍然少則洋洋然得其所也
矧為賦之紀善作放鳧賦其辭曰荷茫茫之堪輿兮
胡萬類之紛敷維水禽之衆美兮盛莫盛於鳧鳧雖
羣游之無算兮非定耦而弗居泛波濤之浩渺兮樂
滄洲之遼復藉軟莎而安眠兮弄輕萍而閒泳頰其
趾而丹凝兮縞其襟而玉腴性於物而不伎兮恒恣
情乎煙沙孰虞人之曾識兮羌潛羅而忽加愛毛質
之綺麗兮遙將獻乎 皇家緊子 皇之仁德兮當
覽春平崇臺體陽和之生育兮澹冲融而舒懷適錫
籠之跪進兮絢晴光於文繡旣彬彬而戢羽兮亦肅

肅而並味啓予 皇之良心兮救俱放乎金濠始依
依而泊漫兮漸翔翔而升高交廻翔返顧兮若感
思而不舍徐翀蜚乎雲霄兮遺餘音乎鉅野何 皇
心之惻怛兮由親親而仁民由仁民而及物兮秩先
後而有倫豈睿鑑於往古今寔誠中而形外思高下
與洪纖今期並育而不悖惟好生而惡死兮人與物
其同情何至德之昭明兮舉一視而同仁觀夫若商
邾之祝網兮暨中山之放麋於禽獸猶有所不忍兮
矧於人而違之尤異乎華陰之黃雀兮終銜環而報
施抑嘗聞江濱之白龜兮先鏹符而朕祺善予 皇

之深慈兮澤旁沾乎微物念蒼蒼之生靈兮曷非辜
而有忽嗟羣鳧之何幸兮脫萬死於斯須遂重登於
遺廓兮從心性之所如歷湯湯之河濟兮依漠漠之
江湖刷羽儀而再整兮顧儔匹而相呼縱物性之或
昧兮將天理之可憑粵作善而降祥兮同影響而足
徵彼罔林之暴殄兮曾少知夫王德匪麟趾之仁厚
兮又烏致夫駟虞之蕃息願擴充乎是心兮明稱攻
而不忒日揄揚於仁聞兮無一夫之不獲卒曰爾鳧
之生兮仁君之恩倏離鼎俎兮翺於天門東西無際
兮南北無垠網羅交張兮增墩相仍慎爾所止兮全

兩性靈毋或輕投兮溟渚寒汀庶永慰乎王心今想
遐征而孔寧盍銜圖而獻贖兮逖詔風以來庭彰予
皇之至治兮發詠歌乎詞臣軼唐虞於千古兮流
無窮之德馨 帝問與紀善議論微異紀善杜門請
告 帝手敕曰旦起聞卿疾亟遣醫問爾宜善自愛
又敕曰日者所言予並無訐卿意予待卿豈他臣比
自卿病予旦夕望聞稍愈吾方加一餐卿後僕之才
弘大之志此心久已靡寧特令予信臣焦榮將書至
且天寒室陋特賜木炭二百斤護卿寒疾并將金脫
寫梅以悅情此文人清致至可領也且此牋非至信

者不予此炭非至喜者弗賜此臣非至重者不遣卿

其察予意焉賜名所居曰葆貞軒

右逸事下

續衣生曰高

宗夢帝發良弼而得傳說 建文帝夢異人授良藥

而得紀善雖興亡不同而主臣遇合之跡良亦奇哉

金陵不守之日假令紀善不雉何以見 孝陵懿文

於地下至今文廟自經之帶來梟猶世藏之嗚呼朕

蘇之節段之笏文之衣帶爭烈域中矣予獨怪 國

初全盛日 建文詔紀善詞有金風慘淡淒涼江山

之句豈知燕之必興耶抑亦詩譏耶

唐王府紀善周公衡墓碑銘

洪若水

周子道通卒於唐府歸塋于宜興其子有徵以其執
友黃門古菴毛先生之狀來乞銘古菴狀曰君諱衡
字道通姓周氏號靜菴常州宜興人曾祖士原祖海
考欽號慎齋妣徐氏生君於邑南舍兒時不好弄恒
侍父母與寢不怠稍長從仲兄衢受尚書補邑庠生
正德庚午領應天鄉薦明年會試中乙榜授江西說
安訓導身率諸士白當道建同門社學萃子弟居業
而升其秀者於泮宮旌孝子劉靜以厲風教刻孝經

刊誤養正羣書以代口授庚辰用御史徐讚薦銓校
湖廣應城縣令朔望則召耆老詢利弊門設二扁署
一曰疏通民情一曰願聞已過立十家牌以弭盜賊
東建謝上蔡祠以風文學西朔常平倉以備賑恤舉
邑政之宜若干條白巡撫秦公公曰可以爲式矣俾
榜堂左刻遵道錄唐錄上蔡語錄心政啟鑰頒訓士
民嘉靖壬午當道疏君耳疾銓司改邵武教授其教
如萬安加密焉創聯屬會友約以資進修復鄉賢游
先生祭蒐集遺書付厥裔孫景壽督學端峰邵公銓
重之與之論學及博約知行之說益嘆服乙酉進唐

府紀善屢以正學啟王尋上定志修學以防逸豫疏
又上修德裕後十二事而明聖學近正人二條尤切
王敬重之乞移半祿養母闋歲念母老假使事歸省
越庚寅藩府以檄來徵命之曰唐藩恩不可忘也屢
促行黽勉致仕舉會極約作希顏日抄議酌行橫渠
井田遺制未遂而止壬辰王疏薦曰周衝心志通明
操持端謹詔加五品俸級儲長史缺八月得疾將瘳
聞母訃號慟轉亟卒實二十二日也享年四十有七
王誄之曰天奪藩珍矣上下咸哀傷之君資稟純明
心神凝靜始爲學銘其牖曰存心爲爲學之要知耻

爲入道之要其志趣可知已在庠從顧山吳先生學
在萬安聞陽明王先生講道於虔亟往受業聞求心
致良知之說以聖賢爲必可學以存天理去人欲爲
下手工夫自應城之京復受學於甘泉湛先生聞隨
處體認天理之要之邵武授諸生以二先生之學信
從者衆嘗遣門人李子榮輩質疑陽明問荅具傳習
錄中自唐府歸省復往見甘泉於南雍益得聖賢之
實語同志曰湛先生之體認天理卽王先生之致良
知也因偕同門蔣子信集師說爲新泉問辨錄撮則
行鄉射投壺禮士皆歛衽推讓涇野呂子東郭鄒子

爲世通儒咸相交往巡撫陳公延君主道南書院教
事辭避再三始就揭白鹿洞規而克廣之士多興起
又闢敬一箴爲會約聞陽明喪與同門黃子雲淡做
先哲作師服議以正學誨諸子弟有容輩屬望甚切
大率君之學篤信二先生之道復論於諸同志所言
知行合一敬義夾持體認天理尤爲切要造詣平實
行履純固庶幾高明矣使天假之年則優入道奧不
顯前謨當大有所就惜不及五十而卒悲夫

魯府紀善潘先生松墓志銘

萬士和

先生諱松字惟喬世居宜興有八世祖名原者以孝
義被國旌典人號孝義潘氏傳至耕樂君禎生述
娶王氏晚而得先生先生年十一而孤家復火遺費
燼焉先生一庶弟孱弱獨與寡母居貧甚然負氣豪
邁初依姊氏讀書同舍郎語稍侵之遂拂衣去奮志
績學晝夜不輟不數年曉暢經史十九游邑庠至尚
書義首尾貫徹爲文直達已意有一日千里沛然決
江河之勢而詞采煥然其師吳文肅公器之延致家

熟復與石菴曹公先君古翁結爲道義交聲名大起
每督學使者至必取其文若行以冠諸生先生疎眉
目美鬚髯容止詳雅音吐清辨當其不言時和氣已
具及聽其言如春風着物無不吹噓而心醉者其交
先君也先君性嚴毅規規矩矩不少貶先生個儻崇
大節然亦無纖悉不中繩墨者先君見人過則面
之先生多事優容故人憚先君之嚴而樂先生之易
卒亦同登于善交戚中有不平事多質成於兩翁或
官府不能決兩翁至則帖帖自息一時學校中翕然
推重每上司至必視兩翁開口先生稟性恬澹絕無

嗜好忠厚長者出於天成平生疎財視棄其餘如棄糠粃因已不好錢貨謂人皆然當其有時輒以予人及其缺乏復稱貸於人不悔也與人交不屑屑計較短長若有德於人人或忘之先生且不知彼之曾受我德寧望其德我耶或遇衆聚會後生小子諛譁箕踞於前先生不加譴訶其人不覺愧服謝遇事母王極孝周旋委曲不失其慳心母病湯藥必親晝夜跪伏床前以此歷三十年而母忘其貧且寡也待弟累友愛篤至凡廩修之人多分與之粟亡棺衾墓地悉身任焉先生故不給年四十六始登鄉試再謁春官

不第乃就任丘縣學諭三年陞新城尹尹有簿書之
冗新城復當孔道性所不喜仍乞教得福州府九年
滿考乞歸陞魯府紀善不赴初任丘人李相國爲其
地擇師銓部以先生應選相國甚喜先生所養完粹
諸儒生一見之已稱得師及聞其教先德行而後文
藝從容有條則又大服其於贊見之禮一切不問察
諸生之貧者捐俸給之擇其中有聰明志操過人者
則館穀之又爲延師啟誨賴以成就相繼登第者甚
衆有司有事必咨訪而行府守招修郡志甚敬重之
部使者薦獎無虛日福州當八閩會省隸省者四學

幾二千人先生設教大率無異於任丘時而誠能動
物到處感發孚化益衆侍御何古林按閩至以兄稱
之不呼其官凡主司考校必命先生略定名次無不
昭令人服其明而先生尤以精通經義受知當道外
府百執事至省必期一見先生卽少年進士固不屈
服由是諸監司馳檄交譽余近游仕途猶及遇兩學
諸生及曾與先生識面者中心感激讚嘆不置其盛
德人人如此先生雖以不耐迎送辭新城尹然疎通
明爽任事有餘其行政公廉愷悌百姓稱爲佛爺有
富民犯法當死屢歲以賄免先生至知其不可賄也

一訊而服此困忠信折獄之效而先生用世之材可
槩見矣惜手數奇道阨終於不顯當先生在任丘時
有上官交薦望重資深復以時方貴奔競而驟居官
幾二十年所得俸錢随手散盡歸田後貧窶如故親
朋常滿室供需不足一笑晏如也襟懷磊落常有鳳
翔千仞之志不以遭阨塞而有所貶損早年氣雄壯
視甲第可以談笑坐取及舉於鄉值強仕之後矣而
不少衰怯仕爲儒官早矣藐談大人若朋輩也所謂
常伸於萬物之上非與初荆川先生避地宜興獨與
先君及先生游而各置兩家子弟於門下由是閭等

益從事於學問等遇事或少奕曲先生曰人言要做
好人須吃虧一分吾謂吃數分虧乃得汝等有意學
好猶不能受虧汝其識之此最爲名言而先生之底
蘊亦可觀矣自致仕日與舊知道通散步於僧寺間
一奕之餘手不釋卷晚年作詩尤有獨得之趣性不
喜奢華而好整潔常掃一室焚香靜坐雖一几一硯
亦必安置有法卽疾病未嘗有蓬頭垢面時也庚申
春始得脾疾不思飲食筴謂諸子曰吾豈神仙辟穀
者乎數月病益亟諸子悲泣先生曰吾卽死何憾又
曰人死必昏憤吾病已彌留而心中更明白何也嗚

呼此非涵養有素者能如是耶